

بسم الله تبارك وتعالى
قصة بداية العالم
سفر التكوين
الفصل ستة إلى الفصل أحد عشر

بداية العالم

النبى نوح يستعد للطوفان

¹والين ابداءو البشر يكثرارو فلارض وخلقولهم امنات، ²شافو الملائكة اعلن امنات البشر ازوينات وكبظوهم واتعرسو امعاهم كيف ما ابغاو. ³وكال الله تعالى: روي ما ييكا فلإنسان الزمن كامل بيهلي هو إنسان فاني ومن ظرك ماهو لاهي يعيش أكثر من 120 سنة. ⁴ومن ذاك الوقت عاد فلارض لجبابرة بيهلي الملائكة اتعرسو امع امنات البشر وجبرو منهم أولاد. وكانو أولادهم هوما لجبابرة اللي معروفين بالحرب من ذاك الزمن.

⁵وعاكب ذاك شاف الله تعالى اعلن شر لإنسان انزاد حته فلارض، وعلن رغبات لإنسان وافكار كلبو كاملين دائما ماهم امسكمين. ⁶واتكدر الله تعالى حته فكلبو اعلنو خلق لإنسان فلارض. ⁷وكال الله تعالى: لاهي انفرق البشر اللي خلقتهم من اعلى لارض، الناس امع الحيوان والمخلوقات اللي يزحفو اعلى اكروشتهم والطيور السما بيلى اتندمت اعلي خلقتهم. ⁸يغير النبي نوح ارضا اعليه الله تعالى.

⁹وهادي هي قصة النبي نوح: هو كان آرکاج صالح ومتقي مولانا من امبين أهل جيلو، ويعدل كل شي طلبو منو مولانا. ¹⁰واجبر اثلت أولاد هوما سام وحام ويافت.

¹¹عادت لارض فاسدة عند مولانا وعاد فيها الظلم وشر لإنسان. ¹²والين شاف مولانا هاذا الفساد اللي خسر حياة كل البشر، ¹³كال مولانا للنبي نوح: جات نهاية هاذا الزمن، ولاهي انفرق البشر كاملين من الوجود بيهلي بسببهم امتلات لارض من الظلم. لاهي انبيدهم وانبيد لارض امعاهم. ¹⁴وعدل لراصك سفينة من لعمد لمتان، وابني فيها اببوت وادهنها بالطين من الكدام ومن النكر اياك الما ما يدخل فيها. ¹⁵وتبينها بهادي الطريقة: طول السفينة يعود 150 ميتر، وعرضها يعود 25 ميتر، وطولها اعلى الفوك يعود 15

مِيتَر. ¹⁶ واتعدل فيها مغطاية يعود امبينها امع السفينة 50 سانتيمتر، واتعدل فيها باب، واتعدل فيها ثلاثة طوابق، التحتاني والوسطاني والفوچاني. ¹⁷ بيّلي راعيني لاهي انمشي طوفان اعلى لارض اياك انفرق كل مخلوق حي تحت السما. وكل شي اعلى لارض لاهي يهلك. ¹⁸ يغير لاهي انعدل عهدي امعاك وتدخل السفينة انتا وأولادك واعيالك واعليات أولادك امعاك. ¹⁹ وتكبظ امعاك فالسفينة 2 من كل مخلوق اذكر ونيشي اياك يسلكو امعاك: ²⁰ أثنين من كل نوع من الطيور ومن كل نوع من الحيوانات ومن كل نوع الحيوانات اللي يزحفو اعلى اكروشتهم اياك يحياو. ²¹ واكبظ امعاك كل شي ينتكل واتخزنو اياك يعودلهم ويعودلك الطعام. ²² وعدل النبي نوح كل شي اطلب مولانا منو.

بداية العالم

مولانا يسألك النبي نوح وعائلتو من الطوفان

¹ومن فم كمال الله تعالى للنبي نوح: ادخل فالسفينة انتا وكل أسرتك، بيّلي اجبرتك وحدك صالح فهذا الجيل. ²واكبظ امعاك من كل نوع من الحيوانات لحلال اسبع اذكور واسبع ناثي، والحيوانات اللي ما هم احلال تكبظ من كل نوع أثنين من الذكور وأثنين من الناثي. ³واملي تكبظ من كل نوع من الطيور اسبع اذكور واسبع ناثي اياك يبكا جنسهم اعلى لارض. ⁴بيّلي عاكب اسبعة أيام لاهي انمشي اسحاب اعلى لارض، ولاهي اتم ماشة مدة 40 يوم قليل وانهار، اياك انفرق كل مخلوق حي كط خلكتو من اعلى لارض. ⁵وعدل النبي نوح كل شي اطلب منو الله تعالى. ⁶وكان النبي نوح فهذا الوقت عندو 600 سنة وقت امجي طوفان اعلى لارض. ⁷وادخل النبي نوح فالسفينة هو وأولادو واعيالو واعليات أولادو اياك يسلكو من ما الطوفان. ⁸ودخلو املي الحيوانات لحلال والحيوانات اللي ما هم احلال والطيور والحيوانات اللي يزحفو اعلى اكروشتهم. ⁹وجاو للنبي نوح ودخلو فالسفينة اعلى شكل أزواج اذكر ونيثي كيف ما اطلب مولانا من النبي نوح. ¹⁰وعاكب اسبعة أيام جا الطوفان اعلى لارض.

¹¹فسنة 600 من حياة نوح فالشهر الثاني فاليوم 17 من الشهر، انفجرت المياه اللي كانت عميقة فالتراب وانفتحو ابواب السما. ¹²ونزلت اسحاب اعلى لارض قليل وانهار مدة 40 يوم. ¹³وفذاك اليوم نفسو ادخل النبي نوح فالسفينة هو وأولادو، سام وحام ويافث واعيال نوح واعليات أولادو الثلاثة. ¹⁴وكان امعاهم من كل نوع من حيوان لخلا والحيوان اللي يُربّاو والحيوانات اللي يزحفو اعلى اكروشتهم والطيور. ¹⁵من كل المخلوقات الحيين جاو للنبي نوح ودخلو فالسفينة اعلى شكل أزواج ¹⁶اذكر ونيثي من كل مخلوق كيف ما اطلب مولانا من النبي نوح. وعاكب ذاك اكفل الله تعالى

باب السفينة.

¹⁷ وواصل الطوفان مشيه اعلى لارض مدة 40 يوم، وركب ما الطوفان السفينة فوك لارض. ¹⁸ وكانت المياه الياسرة اتواصل مشيها اعلى لارض والسفينة ماشة فوك الما. ¹⁹ وانزادت المياه حته يلين غطت لكدا لكبار كاملين اللي تحت السما. ²⁰ وواصلت المياه مشيها يلين الحك طولها اعلى الفوك اسبع امتار فوك لكدا لكبار. ²¹ وماتو كل المخلوقات الحيين اللي كانو موجودين اعلى لارض من الطيور وحيوانات لخلا والحيوانات اللي يُربّاو والزواحف والبشر. ²² ومات كل مخلوق حي يتنفس اعلى لارض. ²³ وفرق مولانا من اعلى سطح لارض كل مخلوق اسوا من البشر والحيوانات والزواحف واطيور السماء، كاملين فرقو من لارض ولا ابكا ماهو نوح واللي امعاه فالسفينة. ²⁴ وابكات المياه موجودة اعلى لارض مدة 150 يوم.

بداية العالم

القربان اللي كقدم النبي نوح عاكب يلين وكيف الطوفان

¹ولا انسا مولانا النبي نوح وكل حيوانات لخلا والحيوانات اللي يُربّاو اللي امعاه فالسفينة، ومثّا الريح اعلى لارض وبدات لارض اتمص الماء.
²وكانت عين الماء لكبيرة اللي عميقة فالتراب انكفلت وابواب السما انكفلو، ووكفت اسحاب الجاية من السما.³ واتراجعت المياه عن لارض اشوي اشوي. وعاكب 150 يوم،⁴ فاليوم 17 من الشهر السابع، وكفت السفينة اعلى اكدا اراراط.⁵ وظلت المياه تنتكص يلين الشهر العاشر. وفاليوم لأول من الشهر العاشر ظهرو روس لكدا.

⁶وعاكب 40 يوم افتح النبي نوح الكوة اللي عدل فالسفينة.⁷ ومثّا اغراب واتم طائر فوك لارض يلين بدات المياه تيبس عن لارض.⁸ وعاكب ذاك مثّا النبي نوح احمامة اياك يشوف إلى عادت المياه ييبس عن لارض.⁹ ولا اجبرت لحمامة ابليدة تنزل فيها بيهلي المياه مزالت امغطية لارض كاملة. ورجعت لحمامة شور النبي نوح فالسفينة. ومد ايدو واحكمها ودخلها شورو فالسفينة.¹⁰ وحانا اسبعة أيام اخرين ومثّا لحمامة من السفينة مرة اخرا.
¹¹ورجعت شورو امع اغروب الشمس رافدة فخشمتها ورقة من صدراية الزيتون اجديدة. وافهم النبي نوح اعلن المياه مصتها لارض.¹² وحانا اسبعة أيام اخرين وبعدين مثّا لحمامة ولا رجعتلو هاذي المرة.

¹³وفاليوم لأول من الشهر لأول من سنة 601 من حياة النبي نوح، فهذا الوقت كانت المياه بدات تيبس عن لارض. وارفع النبي نوح مغطية السفينة وشاف اعلن لارض تيبس حته.¹⁴ وفاليوم 27 من الشهر الثاني ييبس لارض تماما.¹⁵ وكلم مولانا النبي نوح وكالو: ¹⁶اوخط من السفينة انتا واعيالك وأولادك واعليات أولادك.¹⁷ ووخط كل نوع من المخلوقات الحيين اللي امعاك، من الطيور والحيوانات والزواحف اياك يتوالدو فلارض

ويكثرارو. ¹⁸ وخاظ النبي نوح وأولادو واعيالو واعليات أولادو
¹⁹ والحيوانات والزواحف والطيور والمخلوقات اللي يتحركو اعلى لارض
خاظو كاملين من السفينة بأنواعهم.
²⁰ وابنا النبي نوح مذبج لله تعالى واكبط واحد من كل الحيوانات لحلال
والطيور لحلال واذبحهم وكدمهم لله تعالى كيفت قربان محروك اعلى
المذبج. ²¹ واكبلهم الله تعالى وارضا وكال الله تعالى امبينو امع راصو: ماني
لاهي نلعن لارض مرة اخرا بسبب لإنسان امع اعلن ميول كلبو شرير من
صغرو. ولاني لاهي نكتل كل مخلوق حي مرة اخرا كيف ما عدلت.
²² ومادامت لارض موجودة لاهي يعودو فيها مواسم لحرية والحصاد،
البرد والحرمان والصيف والشتا والنهار والليل. ولاهي يتم هاذا هو حالها إلى
الأبد.

بداية العالم

بداية العهد امبين مولانا والبشر عاكب الطوفان

¹وبارك مولانا النبي نوح وأولادو وكمالهم: اثمرو واكثارو واملاو لارض.
²حيوانات لخلا اللي فلارض واطيور السما والزواحف وحوت لبحر كاملين
 لاهي يخافو منكم ويرهبوكم، بيهلي مولانا اعطاكم السلطة اعليهم. ³وكيف
 ما اعطيتمكم الصدر لخطر كيفت اطعام لكم، ظرك عاطيكم الحيوانات. ⁴يغير
 لا توكلو أي لحم مزال الدم فيه بيهلي الدم هو اللي يمثل الحياة. ⁵يغير دمكم
 انتوما لاهي انعاقب اعليه كل حيوان سفكو، واملي كل إنسان لاهي نكتلو
 اعلى حياة خوه لإنسان بيهلي هو كيفتو. ⁶ومن يسفك الدم لإنسان لاهي
 ينسفك دمو، بيهلي مولانا خلّك لإنسان اعلى شي من صيفاتو. ⁷يغير انتوما
 اثمرو واكثارو فلارض. ⁸وكلم مولانا النبي نوح وامعاه أولادو وكمالو: ⁹أنا
 ظرك لاهي انعدل عهدي امعكم وامع نسلكم اللي جاي اوراكم. ¹⁰وامع كل
 مخلوق حي امعكم من الطيور والحيوانات اللي يُربّأو وكل حيوانات لخلا،
 وكل اللي خاظ من السفينة وكل مخلوق حي اعلى لارض. ¹¹ولاهي انعدل
 عهدي امعكم ولا تيت لاهي نسمح باعلن اتفرق مياه الطوفان كل مخلوق
 حي مرة اخرا، ولا تيت لاهي نسمح باعلن الطوفان يجي ويخسر لارض
 مرة اخرا.

¹²وكال مولانا: هاذي هي علامة العهد اللي لاهي انعدل بيني وبينكم وكل
 مخلوق حي امعكم فكل لاجيال، ¹³لاهي اندير خط الندية فالسما ويعود
 علامة العهد امبيني وامبين لارض. ¹⁴والين انمشي السحاب فوك لارض
 ويظهر خط الندية فالسما، ¹⁵نتذكر العهد اللي امبيني وبينكم وامع كل نوع
 من مخلوق حي، ولا تتحول المياه شور طوفان يهلك كل مخلوق حي.
¹⁶والين يظهر خط الندية فالسما لاهي انشوفو ونتذكر العهد اللي لاهي يدوم
 إلى الأبد امبيني وامبين المخلوقات الحية كاملين اللي اعلى لارض. ¹⁷وكال
 مولانا للنبي نوح: هاذي هي علامة العهد اللي عدلتو امع كل مخلوق حي

اعلى لارض.

¹⁸ هاذو هوما أولاد نوح اللي خاظو من السفينة: سام وحام ويافث. وحام هو بو كنعان. ¹⁹ هوما أولاد النبي نوح الثلاثة ونسلهم هو اللي انتشر فكل جيهات لارض.

²⁰ واشتغل النبي نوح فلحريثة واحرث اصدر العنب اللي يُعدل منو عصير العنب. ²¹ واشرب من عصير العنب واسكر واتعرا فخيملتو. ²² وشاف حام بو كنعان عورة بوه وامشا وعلم اخوتو. ²³ واكبطو سام ويافث حولي وداروه اعلى اكتافهم ودخلو شور بوهم النبي نوح فالخيملتو، وهوما كانو ماشين اعلى لورا وسترو عورة بوهم. وكانو وجوهتهم صادين اعلى الجيهة لخر اياك ما يشوفو عورة بوهم. ²⁴ وإلين او عا النبي نوح من سكرو واعرف اللي عدلو ولو الصغير، ²⁵ كآل: ملعون كنعان ولاهي يعود أحقر من اعبيد اخوتو. ²⁶ وكآل املي: يا ربي وإلهي بارك سام واجعل كنعان عبد لو. ²⁷ ووسع حدود يافث، ويسكن فاخيام سام ويعود كنعان عبد لو. ²⁸ وعاش النبي نوح عاكب الطوفان 350 سنة. ²⁹ وإلين اتوفا النبي نوح كان عندو 950 سنة.

بداية العالم

أُمم العالم

¹هاذي لاحة سجل أولاد سام وحام ويافث أولاد النبي نوح، اللي خلّكولهم عاكب الطوفان. ²أولاد يافث هوما جومر وماجوج وماداي وياوان وتوبال وماشك وتيراس. ³وأولاد جومر هوما أشكناز وريفاث وتوجرمة. ⁴وأولاد ياوان هوما أليشة وترشيش وكتيم ورودانيم. ⁵ومنهم اتفرعو الناس من القرىات اللي اعلى حاشية لبحر اعلى حسب قبائلهم وشعوبهم ولغاتهم. ⁶وأولاد حام هوما كوش ومصر ايم وفوط وكنعان. ⁷وأولاد كوش هوما سبا وحويلة وسبته ورعمة وسبتكا. وأولاد رعمة هوما شبا وددان. ⁸وكوش اجبر ول اسمو نمرود اللي عاد محارب امتين فلارض. ⁹وكان صياد مانع بفضل الله تعالى. ولذا السبب يكلو المثل: كيفت نمرود هو صياد امتين بفضل الله تعالى. ¹⁰وتكونت مملكتو فلأول من مدن بابل وأرك وأكد وكلنة فارض شنعار. ¹¹وعاكب ذاك هاجر شور آشور وابنا مدن نينوى ورحوبوت عير وكالح. ¹²ورسن اللي هي مدينة اكبيرة امبين نينوى وكالح. ¹³ومصر ايم اجبر قبائل لود وENAME ولهاب ونفتوح ¹⁴وفتروس وكفتور وكسلوح، ومن كسلوح جاو الفلشطييمين. ¹⁵وكنعان اجبر اطفيل اسمو صيدون وهو بكر وبعدين اجبر حثا، ¹⁶وكنعان هو املي بو اليبوسيين ولأموريين والجرجاشيين ¹⁷والحويين والعراقيين والسينيين ¹⁸ولأرواديين والصماريين والحمانيين. وعاكب ذاك اتفرعو افخاظ قبائل الكنعانيين. ¹⁹وامتدو حدود كنعان من صيدون يلين غزة واخطين من جرار، واورا ذاك شور لاشع واخطين من سدوم وعمورة وأدمة وصبويم. ²⁰وهاذو كاملين هوما أولاد حام اعلى حسب قبائلهم ولغاتهم وشعوبهم وبلدانهم. ²¹وسام هو خو يافث لكبير وهو املي اجبر أولاد وهو جد أولاد عابر

كاملين.²² أولاد سام هوما عيلام وأشور وأرفكشاد ولود وأرام.²³ وأولاد
أرام هوما عوص وحول وجاثر وماش.²⁴ وأرفكشاد اجبر شالح وشالح اجبر
عابر.²⁵ وعابر اجبر اطفالين لأول منهم اسمو فالق وهو اللي فأيامو انقسمت
لارض. واسم خوه الثاني هو يقطان.²⁶ ويقطان اجبر أولاد هوما الموداد
وشالف وحضرموت ويارح²⁷ وهدورام وأوزال ودقلة²⁸ وعوبال وأبيمايل
وشبا²⁹ وأوفير وحويلة ويوباب. وهادو كاملين هوما أولاد يقطان.³⁰ وكانو
ساكنين فاراضي لكدا اللي فالشرق اللي امبين ميشع وسفار.³¹ وهادو كاملين
هوما أولاد سام حسب قبائلهم ولغاتهم وبلدانهم وشعوبهم.³² وهادو هوما
قبائل أولاد النبي نوح حسب انسابهم وشعوبهم ومنهم اتفركو الشعوب
فلارض عاكب الطوفان.

بداية العالم

اخلاية لغات العالم

سلسلة نسب النبي نوح يلين النبي أبرام

¹ وكانت الناس كاملة اللي فلارض تتكلم بلغة وحدة ويستخدمو كلمات يعرفوهم كاملين. ² واخلك اعلن يلين رحلت الناس شور الشرق جبرو واد فارض شنعار واتسعو فيه. ³ وكالو امبيناتهم: وهاو نكبضو الطوب ونشووه بالنار. واستخدمو الطوب ابلد لحجار ونوع من الطين لمتين ابلد الطين العادي. ⁴ وكالو: وهاو نبو لروصنا مدينة وبرج يوصل طولو للسما ونعطو لروصنا هوية اياك ما نتفركو فكل جيهات لارض. ⁵ وانزل الله تعالى اياك يشوف المدينة والبرج اللي كانو الناس يبنوهم. ⁶ وكال الله تعالى: يلين عادو وهو ما شعب واحد ويتكلمو بلغة وحدة، بداو يعدلو هاذا، ما هو لاهي يصعب اعليهم يعدلو أي شي اوخر ينواو يعدلو. ⁷ ننزلو اصا وانخلطو لغتهم اياك كلهم ما يفهم لغة لوخر. ⁸ وشتتهم الله تعالى من فم فلارض كاملة ووكفو عن بناء المدينة. ⁹ ولذا السبب أسماط المدينة بابل اللي معناها الله تعالى خلط لغة العالم كامل. ومن فم شتتهم الله تعالى فكل جيهات لارض.

¹⁰ وهاذي لاحة سجل أولاد سام: يلين عاد سام عندو 100 سنة اجبر أرفكشاد عاكب الطوفان بسنتين. ¹¹ وعاش سام عاكب ذاك 500 سنة واجبر فيها أولاد اخرين وامنات.

¹² وإلين عاد أرفكشاد عندو 35 سنة اجبر شالح. ¹³ وعاش أرفكشاد عاكب ذاك 403 سنوات اجبر فيها أولاد اخرين وامنات.

¹⁴ وإلين عاد عندو شالح 30 سنة اجبر عابر. ¹⁵ وعاش شالح عاكب ذاك 403 سنوات اجبر فيها أولاد اخرين وامنات.

¹⁶ وإلين عاد عندو عابر 34 سنة اجبر فالح. ¹⁷ وعاش عابر عاكب ذاك 430 سنة اجبر فيها أولاد اخرين وامنات.

¹⁸والین عاد عندو فالق 30 سنة اجبر رعو. ¹⁹وعاش فالق عاكب ذاك
209 سنوات اجبر فيهم أولاد اخرين وامنات. ²⁰والین عاد عندو رعو 32
سنة اجبر سروج. ²¹وعاش رعو عاكب ذاك 207 سنوات اجبر فيها أولاد
اخرين وامنات.

²²والین عاد عندو سروج 30 سنة اجبر ناحور. ²³وعاش سروج عاكب
ذاك 200 سنة اجبر فيها أولاد اخرين وامنات.
²⁴والین عاد عندو ناحور 29 سنة اجبر تارح. ²⁵وعاش ناحور عاكب ذاك
119 سنة اجبر فيها أولاد اخرين وامنات.

²⁶والین عاد عندو تارح 70 سنة اجبر أبرام وناحور وهاران.
²⁷وهذا سجل أولاد تارح: تارح اجبر أبرام وناحور وهاران، وهاران
اجبر لوط. ²⁸ومات هاران سابك بوه تارح فلارض اللي اخلك فيها شور
أور الكلدانيين. ²⁹واتعرس كل من أبرام وناحور وكان اسم اعيال أبرام
ساراي واسم اعيال ناحور ملكة منت هاران اللي اجبر ملكة ويسكة.
³⁰وكانت ساراي عاكر ما اتخلي التركة. ³¹واكبظ تارح ولو أبرام وول ولو
لوط ول هاران وساراي اعيال ولو أبرام وامشاو فابلد من أور الكلدانيين
واعدين ارض كنعان. يغير يلين لحكو حاران سكنو فم. ³²ومات تارح
فحاران يلين كان عندو 205 سنوات.